



東坡山房詩錄

五言
近體

匏



五言律詩

濮陽李先芳著

初遷戶曹郎留別縣齋

三年遙作令再命入為郎捧檄情何極還家親
正強縣齋長兒女民社愧循良祖帳東門道并
州意未忘

七月十七日清江鎮

初度逢今夕停撓憶北堂倚門萬里眼落日九
迴腸寸草催先結歸鴻滯後行三年遊子淚濕
遍綵衣裳

九江

水府平如鏡中流穩坐看湓浦吞吳盡匡廬控
楚寬歸心逢雨切秋色渡江寒忽漫風濤起扁
舟纜急湍

送桑少尹赴平涼

漢家徵猛士結束事平涼佐郡車隨兩防邊劔
有霜關雲經隴斷渭水入秋長予亦壯遊者相
將餞北梁

送蘇子長南還

北風淒以寒之子戒征鞍久客長安道應知行
路難還鄉馬蹄疾握手客心酸諸謝通家久相
思寄筆端

送孫給事謫秦中

君謫秦中縣遙尋杜曲花天涯禁去住吾道且
龍蛇諫草焚須盡官衙到是家孤雲有時返見
日即京華

送徐膳部乞養還浙東

海內論才子偉長最得名兩部初就賦一疏早

陳情春水浮舟穩
林花拂袖輕
趨庭多暇日
高枕聽江聲

涿鹿道中

楊柳喚斑駁
芳春遊子歸
條風拂行蓋
春草變
征衣
鴈帶斷冰
下鵬盤斜日
飛遙遙
望城邑
古塔書霏微

大寧寺遇謝山人遊岱宗還

爾乘婚嫁畢
了此岱宗還
漢時誰同訪
秦松幾
度攀迴車
故里道傾蓋
雙林間
應笑輜軒者
風

塵不暫閑

贈高宿州上計

神禹塗山會
鍾離漢代城
使君久為郡

天子素知名
車服明揚重
圖書歸計清
幾年懷
禁闥攬轡不勝情

滁陽驛

西澗夏雲滿
南滁春草斑
開亭坐流水
捲幔納
青山
虎豹屯三輔
人烟接九關
皇華媿天使
車馬日閑閑

瑯琊寺

瑯琊久擅名山水攬予情不擇蘼蕪逕寧辭風
雨行歸雲陰洞滿明月淥溪平一悟楞伽字甘
心老化城

醉翁亭

昔聞太守醉遺此醉翁亭一逕蒼苔古環山翰
墨青獨醒吟澤畔愛酒問天星泉水甘如釀冷
泠漱晚汀

豐樂亭

豐山開樂地臨眺憶前賢臺謝留芳躅碑銘失
舊鐫水啣栢子殿石咽紫微泉徙倚松潭上南
譙起暮烟

曉渡江望鍾山作

橫波浩無際煙霧曉冥冥宮旭分江岸金陵挂
翠屏髯龍蟠地軸崑鳳駕山靈絕勝蓬萊水千
門島嶼青

望靈谷寺

鍾陵盤大麓靈谷護東林苑廐分僧飯江徠學

梵音松杉停落日陰雨斷遙岑延想青冥上因
風寄遠心

高座寺同彭博士金高二秀才作

言念朝中舊來尋江上山風流還晉代人物表
江關講德諸生在談經高座閑竹林同散步忽
到白雲間

鷄鳴寺

蘭若近天都曇雲湧地符畫廊迴石磴寶塔闕
玄珠山冠憑虛閣城吞玄武湖鷄鳴一以望宮

關五雲扶

臺城懷古

不盡登山興還成吊古行烟中二水合鳥外數
峰晴世代看波浪園陵指夾枰蒼蒼松柏裡何
處是臺城

謝安石墓

晉陵何處所今年謝公墳羅綺山花代音徽水
竹分烏衣隨太傅寶樹憶將軍一笑安江左斯
人嗟不群

同顧比部約遊燕子磯臺不至

何處堪行樂山陰訪釣磯汀洲飛燕子巖閣倚
江妃載酒逢朝雨停車悵落暉空餘幽興極共
帶暮潮歸

江東門別徐侍御黎郎中 二首

昔醉長安市今逢建業城夢中酬白壁掌上問
青萍使者江南邁郎官白下清相攀畏相別離
思逐潮生

春雨鱗魚候吳宮花草間天涯杯酒盡歲月幾
人閑門駐青驄馬舟停綠水灣宦遊俱是客楊
柳未須攀

江浦寄別留都所知

返棹渡揚子千巖蒼翠間秦淮去不息牛首重
難攀京洛情人滿王孫春草斑翱翔江水上不
忍別青山

清流關

清流望不極杖策赴重關
劍北啣恩至周南結
迴還石泉宣鐵騎巖月掛
刀環欲問南唐事流

雲度遠山

寄盧龍吳明府

縣倚重關險身當一劍雄防秋先薊北選士得
山東政事絃歌暇戎機指顧中治平誰第一天
下有吳公

送石明府赴清河

淮南新剖符亦是宰王都流水隨公事青山入
板圖土風多種橘時政且鞭蒲莫問盤根地懷
中有麻盧

送蘇子長赴陽和省親

時乃翁以尚書總督宣大

萬里寧親路三春遊子顏半酣倚驄馬回首別
青山胡塞月初滿虞庭師未班旋聞歌杖杜同
入玉門關

和蘇子冲伯仲城南汎舟

故人愛秋水小艇汎晴川競和滄浪曲遙傳漁
父篇水村交白鷺風樹遍玄蟬何日携尊酒同
牽李郭船

山莊飲從弟西成

日暮柴桑里天風木葉飛山中新酒熟從弟晚
相依地迥孤雲靜林深宿鳥歸謝家群玉樹愛
爾最芳菲

訪劉文潛山莊

杖屐訪山居空堂滿架書松篁生楚調風壤似
秦餘林雜深簷雀池通小澗魚村醪有佳味落
日返柴車

送黃復之赴蘭州守

次公勞出守騶馬赴邊州隴水逢秋結黃河出

塞流龍荒秦六郡虎竹漢諸侯回首舉蘭下應
分西顧憂

何使君郡齋留酌

郡齋幽僻處下榻晚相過為政風流者閑居詞
賦多清尊逢北海高論比懸河獨有山中客春
深悵薜蘿

送孫山人遊秦中

罄折功名拙匏居歲月踈家無三畝宅腹有萬
言書按劍誰知已談詩空起予秦中千里道念

子出無車

西園對月飲弟仲連 二首

長夏厭早起西園向晚過坐深涼意入月正綠
陰多習習風鳴竹悠悠雲度河瓶中有餘瀝及
爾醉青莎

共坐不知晚月明忽以西草邊蘆席穩醉後葛
巾低荷逕迴風入柴門立馬嘶清光能不負來
夕酒重携

野望

立馬望秋林天風落葉深澹烟橫去鴈積水度
遙砧冉冉東陵樹飛飛舊井禽不知歲云暮猶
切少年心

答何使君

春寒畏出郭兀坐小亭虛酒伴能相命花朝忍
獨居聽鶯過別苑藉草上新除倘赴東風便柴
門候鷺車

暮春

和風攪亭竹雅笋欲交加藻思添芳草春愁剝

落花簷樓黃口雀林乳白頭鴉生惜青陽暮空
悲兩鬢華

寄王仲山

江東推獨步文度最知名
蘭澤幽人興鱸魚故
國情題詩悲鳳去
貰酒上鷄鳴誰共清
冷子金陵寫翠屏

雨後西園即事

西園逢霽雨初伏
失炎天把卷班荆坐
搔頭對鶴眠
檀欒萬竿竹清切
數聲蟬徒倚衡門下
微

薰正颯然

同何使君祝大行飲張氏水亭

四首

報書呼酒伴駐節到山家
地主歡投轄園丁喜
進瓜納涼移皂蓋
秉燭醉皇華西堰看花處
芳尊照落霞

上客褰帷地東家負郭田
高槐繫驄馬踈柳噤
玄蟬稚子呈家釀厨人烹小鮮
何妨山簡醉潦倒習池還

白社蓮花淨青門楊柳踈
花間明月滿池上綠

尊虛與極隨苔坐詩成藉竹書相從大夫後日
暮駐柴車

同携金谷酒來問水亭花小逕垂楊暗高樓語
燕斜地如河朔飲人即輞川家歸路同明月相
將白鼻騮

送鍾明府之京

客有壯遊者來觀鄒魯風江湖千里外心事一
尊同暮雨淹行騎秋原響候虫明朝直北望飛
鳥五雲中

顓城懷古

城濮何年戰陳臺幾度遊漁梁開曉市雉堞委
寒流落鴈空王宇浮雲古帝丘天高秋色遠臨
眺思悠悠

中秋對月

海月照高樓湘簾對上鉤晴光移白晝酒盞屬
中秋北斗斜柯見明河曲檻流涼風在庭樹露
葉晚颼颼

秋夜飲張氏園亭

別館開尊夜中秋對賞時風花添酒氣月露慢
筆絲晚坐依松逕高臺泣竹枝清遊意不盡莫
問夜何其

送蘇明府之京

仙吏赴名都銓曹重剖符先聲在劇雉新政且
飛鳧行李函秋色寒花泛酒壚平生千里足珍
重取長途

送陶生還浙中

東南多事日之子赴錢塘可歎紛華地今為戎

馬場江湖慎出入兒女戒舟航到日平安信因
風寄一行

田中郎事

十月收殘稼開林坐夕曛涼風扶竹杖積雨結
苔紋木落牛羊逕秋登鵝鴨群為農吾不厭世
業本耕耘

留飲蘇子冲對菊得琴字

銀燭淹清夜黃花醕所欽地如元亮宅人入伯
牙琴稚子度新曲高風來遠砧兀然一斗酒相

慰歲寒心

寒夜即事

歲杪新釀熟厨人進晚餐燈前稚子戲膝下老
親安更衣寒較重久坐夜將闌勿謂尋常事清
平世所難

清源道中

停驂望河曲村杪戍樓懸城壓天橋水冰膠板
聞船肆場人語別驛踰馬蹄穿薄暮臨東道千
家沸晚烟

夜宿智度寺

歲暮招提境天涯遊子吟無生探上界有夢隔
東林鵲繞南枝盡鷄啼五夜深空庭對蕭索松
檜表予心

易水遇高氏部

共傳蜀道險日日有行人遙自青天下均沾紫
陌塵酒中燕市月花裏漢宮春壯士今安在悠
悠易水津

洪德宮寓目

涿鹿軒皇郡汾陰漢代宮山沉太行斷水咽紫
荆通地勢蛟龍窟關門虎豹叢甘泉誰獻賦文
似愧楊雄

初至都門寓大覺寺寄城中所知

三載遠京輦茲晨濫玉珂重關新虎豹九陌舊
笙歌寒壓緇塵重春催白髮多招提城下客咫尺
隔明河

寺夜同子冲守歲

古寺逢除夕天涯杯酒親暗添犬馬齒倍惜宦

遊身莫羨摧殘鴈椒花憶遠人相寬期盡醉潦
倒益沾巾

贈高比部

三楚多才彥夫君更出群獨慚下里曲每就郢
人介結社隣芳草同官坐白雲平生山水意莫
惜故人聞

附贈答

高岱

夫君負高格瀟灑淨塵襟抗俗榮名薄論交
道氣深一尊聊北海隻字可南金玄草應充

棟無人識此心

送李于鱗還順德

計吏還襄國，銜恩出漢宮。
都門淹落日，千騎下扶風。
別酒三春暮，行裝一劔空。
後期應在目，天子問河東。

直省中不得郊送吳給事

株守一官懶，蓬飛千里遙。
相看纔咫尺，不得上河橋。
龍劔莫輕試，虎溪將見招。
寸心何以恨，溢浦不通潮。

賦得太白樓

有客客任城，相逢賀四明。
塵中能倚馬，天上獨騎鯨。
當日一尊酒，高樓萬古情。
芳聲流不盡，濟水至今清。

送王鄭二按察同赴廣中

禁籞百花明，仙曹聯騎行。
忽驚雙鳳侶，飛入五羊城。
贈劔星河曙，還珠海嶼清。
枕榔聽高鳥，不念故人情。

贈陳員外由虞部入西曹

良晤真難得大音豈易陳
喜逢滄水使同門
白雲津玉樹誰堪倚
瑤華衆所珍
乃知射雕手半是握蘭人

附贈答 二首

陳宗虞

李白山東彥雲孫得使君
唾因風落玉筆有氣凌雲題
品山川重精靈海岱分何緣接
蘭省長日引清芬

展卷清秋夜陽春調自孤鷄林
爭售值驪頷獨探珠真見傾
三峽還知駕兩都念予山水

意從子學操觚

夏夜省中贈高伯宗

西曹同信宿瀟灑似山林
促織先秋發涼蟬入夜吟
幽蘭隨意入流水定交深
借問東方朔金門何陸沉

送陶郎中赴南海太守

問子今何遠南遊五嶺間
贈言歌楚調回首別燕關
海上乘黃鶴臺中放白鷗
一麾清道路門外是千山

對酒懷子冲

長夏初過雨微涼
泛濁醪官情醒處澹
世故醉中逃
同病無書至孤雲有夢勞
不知稽叔夜何以絕山濤

生日省寮見過留飲

六月不辭暑高軒勞問年筵開初度日
人坐夕陽天芳草迎秋序高槐駐晚烟
轉愁黃髮暮留醉白雲邊

河上送蘇錦衣

闌暑理行擢東郊涼意深
蟬聲衝雨歇柳色度河陰
積水斜侵郭遙山半出林
聊因送歸客紆我倦遊心

送高進士使山西軍餉便道郢中省覲

策馬渡黃河秋風捲夕波
遙聞太原卒日夜擁琯戈
轉餉王程遠還家芳草多
郢中桑梓地白雪共誰歌

送田民部赴留都

清秋滿京洛孤棹下江東
別署分雙劍他鄉共

一蓬望君如旭日送子托晨風題柱應相憶
屈流在漢宮

送蔡明府赴蘭谿

臺中推玉樹江上綰銅章
穀水穿溪綠金華泛酒香
地分荀令尹才是蔡中郎
蘭澤多幽興何人共採芳

送新喻唐明府

茂宰之江縣銅章我舊携
官衙凭玉几驛路遶羅溪
往事慚留犢新聲笑割鷄
後庭曾種樹今日幾枝低

同張內翰題報國寺古松

為訪菩提樹來攀羅漢松
歲華翦玄鳳偃蹇掛蒼龍
寒色凌香閣秋聲雜梵鍾
祇園清絕地趺坐話雙峰

白雲樓

秋臺坐岑寂官閣俯長天
落日生秋色晴空澹晚烟
風花携酒入山水抱琴眠
自信樓居者前身是列仙

秋夜別徐少參兼寄李于鱗王元美二憲

副

久客秋將別他山
菊又花為沽燕市
酒留醉使君車
海上王喬舄山東
李白家相逢勞借
問去住各天涯

九日九龍池

四首

九日荒山下園陵
奉祠時還將戲馬
曲來就鑿龍池潭
空寒雲入秋澄白
露滋橫汾千載後
重覩漢官儀

秋咽龍池滿分溪
遶澗斜深山逢九
日曲水泛黃花在
鎬歌周德臨流繫
漢槎叨從章甫末
佇望五雲車

昔有龍山會龍池
今復開澗迴樵徑
險雲去鼎湖哀飛
鳥向空沒明珠近
夜來甘泉誰作賦
牢落子雲才

玉水開天鏡金波
繞石壇來攀珠履
客吟弄水晶盤風
勁蕪葭夕山秋蘿
薜寒真源欲有問
川上坐觀瀾

陪祀 茂陵

山暝松楸合秋深霜露哀夜驅天馬步神送燭
龍來風木堆金粟橋陵掩玉臺 憲皇弓劍在
靈氣日昭回

夜下天壽山

朝乘白雲去夜下翠微峰石虎行秋草林鴉肅
暮鐘風吹五陵樹月落萬山松歇馬天門外蒼
梧紫氣重

冬夜方民部汪庫部見訪

二妙臺中選高軒喜並臨正逢臘酒熟留醉夜
燈深末路難相假窮交易見尋好將白雪唱一
慰歲寒心

附和

方弘靜

萬戶寂以閑遙遙素月臨非予美玉度孰為
清夜心嘉晤良匪易微言庶可尋寥寥千古
意為奏風中琴

答子川子冲見寄

念爾雙黃鵠不隨玄鳳飛手持慈母線淚濕老

萊衣書至燈花滿人歸
兩雪霏誰憐暗投者
啜有珠璣

附見寄

蘇濂

有美經年別雲霄
振羽儀風懷鴻鵠
志新拜
爽鳩司一札
勞存問三秋
多夢思
聖朝刑
措久退食
但哦詩

蘇澹

蕭寺談文久燕京
恨別新誰知
附鳳客却憶
飯牛人舌在
寧論賤書來
轉慰貧
小山叢桂

裏何日接清塵

張翰林席再送劉給事赴留都

今日胡不醉明朝
千里行兵戈
廣陵道雨雪
薊門情玉署
燈花滿金陵
諫草成願從
雙闕下遙聽鳳凰鳴

臘月十五夜同張西吳飲馬孟河宅得風字

貰酒入新豐
含香出漢宮
為看雙玉樹
來繫五花驄
夜月留張翰
笙歌醉馬融
那堪三五夕
歲

暮更天風

春日登毘盧閣

攬衣上層閣曠望欲沾巾
時序逢三月風塵老
一身雨中千嶂夕花裏萬家春
亦是天涯客年年送別人

送郭光祿謫黃州

同遊滿京洛念子復分襟
出郭聞啼鳥逢時歎
展禽黃金漢宮賦白壁楚臣心
握手嗟何及含情兩不任

寄懷蘇子長四宜園四首

憶昔東隣竹相遇不厭頻開林
花識面入戶鳥依人
月掛連枝樹風吹折角巾
此時攀地主諸謝玉嶙峋

近郭無雙地名園有四宜
松風生午夢蕉雨入秋思
客至題允鳥詩成比色絲
遙將燕市月為照習家池

曾携春興往東郭聽黃鸝
月上人初醉花深路轉迷
金蘭送入夢桃李舊成溪
縮地可由尋月

風寄馬蹄

故山開薜荔春酒酌榴花醉許能吞月狂惟任
折麻厨人鱸膾美筆女鴈行斜好是芳菲節年
年不在家

初夏即事

芳草日青青山人醉未醒移家隣御水回首見
浮萍綠蟻留春住黃鸝隔樹聽門庭多喜事梁
燕又添丁

報國寺遲時比部

松間來繫馬花下坐聽禽一入空門裏偏宜靜
者心清齋鐘梵晚古殿薜蘿深為寄招提客相
將訪道林

送鄒文學之貴池

鄒衍談天客携書下玉京官分秦博士地是謝
宣城秋浦當尊滿齊山入戶清莫言官舍冷四
座有諸生

題蘇子長畫牡丹卷

偶閱看花譜因傷經別時人懷金谷彥花馬客

陽枝無力如愁婦多情出畫師春風勞見贈片
片是相思

夏日同謝都諫隆福寺同賦得東歌二字

各一首

古寺禁城東登臨陪謝公炎天開佛宇盡日坐
簷風洗鉢雙龍出開簾一燕通長安車馬地清
嘯幾人同

九陌暮鐘歇空齋明月多因僧話禪寂立馬候
松蘿城上流雲盡花間宿鳥過坐深人欲絕歸

路劇鳴珂

月下張賀部見過得花字

言訪白雲舍來乘白鼻騮千門初霽雨一樹復
開花月出人烟淨河明禁苑斜因傷在城闕日
日逐風沙

送李明府之歷城

冀北論才子君如金裘蹄命名疑幕藺出宰復
分齊新政明湖潤嘉聲鵲華低軒車如見訪家
在岱宗西

晝眠

溽暑侵冰筆高齋足晝眠
開窓來遠岫拂枕散輕烟
宿雨琴書潤新晴花鳥妍
起看人吏待立馬夕陽天

張考功馬翰檢見訪留飲得星字

城闕人稀到軒車晚自停
孤雲於世澹雙眼為君青
客至留卿月天開見酒星
相逢歌既醉宦蹟本浮萍

同賦

張九一

霜雪朝能霽琴尊夜可消
寒辭三殿盡春入九關遙
北渚回鴻鴈南宮變柳條
相將坐暝色海月破烟霄

夜直署中有懷

散吏真樗散公餘每坐深
初晴聞蟋蟀幽意屬山林
解帶清風入開簾好月臨
美人不在賞空負白雲心

閒居 四首

東山有狂客改服事朝簪
混跡為冗吏閒居養

道心行吟春草歇坐卧夏雲深世事堪寥落何須嘆陸沉

偶卜三間宅還栽數種花客心隨所適兒女若為家霽雨流塵滅開軒涼意加自無車馬至不

是避喧譁

不閑適俗韻齟齬自年年處世從牛馬開尊且聖賢口高還抱膝風至一鳴絃豈是揚雲宅無勞問草玄

久客迷鄉國端居愧俸錢雖乘沙苑馬何異竹林賢山水分公事琴書攪獨眠翻思拂衣去歸種汶陽田

省中對酒贈高伯宗寮長

我有一尊酒為君傾夙歡眼中少知己客裏重加餐宮漏千門淨秋臺五月寒莫將獨醒意來向醉人看

和襄陽龔兵憲見懷

四首

漢江聞渡虎新政似劉昆暇賦銅鞮曲遙懷金馬門山川誰握手花月幾開尊老我長安道雲

泥未可論

故人十載別世事幾紛更悲喜雲中札寒暄江
上城青山他日夢白雪舊時聲屈指同遊者悠
悠何限情

聞汝東歸日褰帷訪敝居館人留下榻稚子候
停車簪組遙相命松篁迥自如尚懷千里駕為
報呂安書

君為外臺使同此簿書勞畫戟分兵衛青雲注
法曹習池好風景楚客有離騷莫以江湖闊逢

人問小劬

附見懷

四首

龔秉德

憶昔垂髫日憐君意氣真蕪葭連玉樹桑梓
接芳隣聽雨同床夕看花把臂辰邇來交道
薄此義重須陳

自汝通朝籍寒暄幾變更心隨孤鴈遠髣已
二毛生宦薄傷萍梗秋高寄杜蘅袖中書未
滅讀罷一含情

生歲過鄉間登堂問起居我纔亭越訪君已

命燕車冀野方收駭湘江好寄魚西風正搖
落懷子意何如

十載稀相見思君夢轉勞清標聯上苑華譽
滿西曹用法寬周典摘文逼楚騷南來無驛
使延佇漢江舉

送林侍御江南督漕

君行按吳楚驄馬去翩翩海上風烟合江南賦
稅偏問閭多菜色郡邑少蒲鞭繡斧經過地殷
勤奏日邊

立秋後一日助甫見訪得霜字

屏居對芳草同病喜相將闌暑人如醉新秋髮
有霜蟲鳴風雨夕螢點薜蘿墻後夜看牛女還
期就一觴

送史員外量移松江少府

佐郡勿嗟及之官已量移大才無不遠公論重
當持秋至鴈歸早江寒帆去遲漢庭多雨露未
許別經時

夜直省中贈羅惟德

秋夜天如洗明河歷歷分金莖搖碧落珠斗掛
青雲心逐歸鴻翼身隨病鶴群相看雙劍在燈
下拭龍文

海印廢寺晚望

晚樹集宮鴉鳴珂度狹斜遠山落蒼翠秋水靜
蕪葭古寺恒沙沒高城漢苑遮河梁深立馬天
上是皇家

東惟德白雲樓望月

今夜看明月相期上白雲踈鍾不出戶遙鴈忽

離群秋至衆山出天清雙杵聞高樓寒色遠落
日遲夫君

晦日再送王比部得更字

停杯傷遠別秉燭坐深更為逐歸鴻侶其如落
葉情秋蕪涼月盡人帶法星明去去紅塵道應
懷漢署清

東岱山房詩錄

濮陽李先芳著

五言律詩

送萬通政歸省豐城

位藉銀臺選名從藻鑑收烟花留上客桑梓憶
南州不為秋風起真成晝錦遊承歡多暇日迢
迢望京樓

歸興 二首

微霜燕草歇九月薊門秋落日看歸鳥涼風吹
白頭山中多桂樹江上足少鳥頭在雙飛翼用

從張翰遊

問爾逝何適我家東海東神龍不受縛天馬自行空道逢青鳥使寄語紫芝翁為掃鰲山石吾將學釣翁

由法曹入符臺作

謬籍通丹掖遺身下白雲班從三殿直膳自大官分日近爐煙合天清宮漏聞龍池春似海鷗鷺自成群

憶登昆盧閣

秋杪一以望晨光澹遠山踈林覺心爽涼雨助僧閑面目還疇昔風塵總厚顏願携清興往高卧白雲間

對月送張僉憲得風字

華燭夜堂紅霜清鴈叫空停杯待明月留客賦秋風蜀道千山外青天一鳥通晴光如不負弦望有時同

對菊再送子畏得歸字

秋葉不堪聽同袍復遠遠誰知搖落後此地有

芳菲綠酒青驪曲黃花繡豸衣歲寒將別意一
倍惜音徽

送熊憲副赴任河南

伊昔清江上高樓酒一尊雙龍隨地合喬木幾
家存復此遊梁日相將別薊門杪秋風雨夕落
葉不堪論

冬日送呂四丈南歸兼寄舍弟

少年如昨日白髮忽盈梳老至憐雙劍冬殘憶
敝廬故人千里別兄弟數行書見日應相悉官

衙水不如

長至日感述

北極初陽至西山落日低乾坤正冰雪湖海尚
鯨鯢方朔留金馬王褒走碧鷄東南多事日雲
物望中迷

歲暮

自不能逃世棲身朝市間無醫迴白髮有夢到
青山實少冲天翼空陪捧日班何如歲云暮未
見馬蹄閒

元夕張助甫宅同伯宗賦得火樹銀花合
帝里逢元夕千門火樹花煙中亂紅雨夜裏發
丹霞墮地枝如委隨風葉漫斜隔墻紛萬朶春
色在君家

同賦

高岱

瑞彩生寒夜芳筵照酒杯巡簷飄月桂傍檻
落寒梅遙雜春星動還同夕宴開芳菲驚滿
眼羯鼓不須催

張九一

火樹排虛上銀花入暗開一宵春色到萬戶
夜光來對月鶩飄桂臨風擬落梅莫辭歸去
晚携得艷陽回

早春送朱大參范方伯同赴河南

愛爾雙龍劍相將出鳳城紫微還舊省白雪喜
同聲御苑鶯先至王程草自生長河流日夜應
見故人情

直 端門春望

自直含香署頻過建禮門地高山盡入春早樹

先温城闕群龍抱樓臺五鳳蹲憑欄西直望風
雨下崑崙

上陵畢訪劉氏山莊 二首

園陵從祀罷水木足清遊月出衆山白鳥鳴千
嶂幽好花經雨濕芳草帶春柔歸路知非遠軒
車盡日留
名園能近郭芳樹自邀賓排闥青山入開筵綠
酒親麥秋三月雨花夕五陵春明發長安陌風
塵不可人

迴龍觀

法宮還繫馬勝地此迴龍人醉新豐酒風吹長
樂鍾高原攀玉樹晚節見青松却望烟花市千
門錦繡重

懷張董二比部謫居

桂嶺蠻烟重梓柯瘡癘繁丹心能作伴白日莫
含冤有字憑誰寄思君未敢言應將漢庭淚灑
向粵江猿

夏日昆盧閣

京邑空多寺，人天自不群。
風回六月雪，樓壓萬峰雲。
上界鐘聲渺，千門樹色分。
清涼初服地，香靄晝氤氲。

送湯都諫轉留都通參 二首

月卿臨白下，星使出黃門。
地已分中貴，官尤重納言。
晝遊攜李郡，秋薦秣陵園。
向夕看南斗，龍文徹紫垣。

銀臺今獨步，青瑣舊同闌。
恩自三天下，人從八舍歸。
賜蘭曾握手，折柳欲沾衣。
暇日揮雙管。

應多錦字飛

送王侍御出按甘肅

君王重分陝，使者出秦京。
紅岸祁連樹，黃雲張掖城。
馬行天盡處，人去海西營。
定有涼州曲，遙傳絕塞聲。

夜坐

初月掛西壁，明河動微陰。
流螢乍明滅，蟋蟀時一吟。
自識浮沉理，都忘去住心。
瓶中有知己，相對莫辭斟。

送樵比部還蜀

平生多齟齬蜀道未應難
爾去將孤劍誰其戀
一官回塘秋水急飛棹
夏雲寒莫謂相如老
還爭駟馬看

聞何員外遊西山諸寺作

聞汝尋名寺連朝未擬還
月邊逢望夕湖上對
秋山孤嶼題詩滿青雲
載酒閒因之意飛動雙
樹昔曾攀

中秋夜讌張太僕宅

長安今夜月此地最宜看
綠酒開金谷青天行
玉盤徵歌風浙浙移席露
溥溥更欲乘槎去明
河向曉寒

送毛比部改任留都

建業佳山水官衙湖上開
君隨鴻鴈影秋入鳳
凰臺風壤三吳似鄉園
一水迴金陵花月夜誰
與賦深杯

暮秋夜集高伯宗宅遲汪方二水部范比

部得來字

待月月已出望君胡不來况逢桑落候恐負菊
花杯晚市烟光合嚴城鼓角催停鐙遲三益佳
句為誰裁

送鄒信甫下第還廬陵

鄒陽嘆曳裾秋日賦歸歟白壁無知己青原有
舊廬鳳麟元自別羅網未應疎且抱豐城劔匡
山讀父書

贈答周生才甫

永嘉山水郡之子故能文古帖臨青李高情屬

白雲澧蘭香易入郢雪調平分何限投珠意當
令知者聞

贈彈琴梅生月壑

彈琴坐夜鐘十指若游龍正對千門月疑聽萬
壑松上絃招海鶴別調起秋蛩虛館清人骨悠
悠塵外蹤

送吳比部赴福州太守

南中君景遠復此赴閩中握手千山雪開帆萬
里風冬殘烟瘴息波靜海門空他日循良傳應

收第一功

送項生還永嘉

一讀山中作君才過項斯豈惟標格律更覺羽
毛竒客思秋風起歸心芳草知何時同載酒孤
嶼坐題詩

送汪正叔

冰雪滿京邑軒車臨路岐殘年春酒熟不是別
離時故舊日以遠斯文空在茲因之托江水相
送楚天涯

簡高伯宗

歲暮俗不了相期話夙心空沽燕市酒難聽郢
中吟知己半陳跡新詩誰賞音九衢車馬盡何
處拂塵襟

再題張有功聯輝館

起家貧宰相狎世醉叅軍兄弟雙瓊樹文章五
鳳群花間留日月壁上走風雲遙夜憑軒坐星
河歷歷分

元日飲李京兆宅

元日長安道東風十萬家馬蹄逐流水春色在
高衙椒酒寒生碧蘭燈夜作花嚴城鐘鼓沸忘
却是天涯

簡袁太冲

初喜懷人至翻嫌旅病疎尚方仍賜舄南陌暫
停車白首三春別青雲萬事虛相逢不一醉何
用寄雙魚

贈黎惟敬

失意太行道棲身京洛間懷中問明月海上憶

青山出處情難白風沙鬢已斑鄉園千萬里心
折大刀鏢

送林僉憲赴河南

此意竟誰陳行行且自珍暫辭香案吏猶是憲
臺臣立馬都門道聽鶯御柳津不堪花下酒又
送夢中人

普恩寺訪史少叅

故人千里至蕭寺一尊同晚市浮烟盡諸天明
月空香床無俗氣鐘梵有清風社中饒酒禁留

醉與陶公

題周山人窓前鸚鵡

爾本山林鳥金籠此暫羈翻飛竟何日羅網憶
當時總為稻梁計空憐毛羽竒但留長舌在不
用學張儀

出郭望西山作

人事那可極出門望青山心將流水遠目送碧
雲還首夏初蟬嘒新晴百草斑行吟意不盡回
首市朝間

大佛寺慧雲洞天

佛日臨初地慈雲出洞天園開三士果燈結九
枝蓮閣迥蟠龍藏林深泛虎泉西來八百寺此
處可逃禪

送長子劉明府

我讀循良傳劉君第一歌故人之上黨新政復
如何家世蒲鞭在碑陰棠樹多鳩山山下水一
飲挹清波

黎進士梁中書周山人晚集小齋得山字

浮沉豈殊調去住且開顏
走覓高陽侶悲歌燕市間
清尊對芳草落日滿西山
車馬長安道誰如此地閒

附得頻字

黎民表

相携三徑裏因得遠風塵
雨葉全低樹林鶯稍喚人
青雲詞賦早滄海性情真
花事今餘幾街杯肯厭頻

謝符卿以苦雨詩見示走筆答之

積雨不出戶開簾烟霧深
無心對芳草有客賦

愁霖世事皆萍泛生涯久陸沉
逢人難假蓋何路覓知音

問黎惟敬疾

九衢平似掌行者自迷途
念爾羈棲客相將藥餌扶
黃金百鎰盡滄海一鱗孤
昨夜新涼入應教旅病蘇

送太僕張有功河南市馬二首

君王重邊塞市馬為防秋
不惜黃金價遙將駿骨求
炎天辭魏闕風雨下中州
河洛多各種驪

黃莫濫收

長安旬日陰九陌馬蹄深送子青門外相將綠
酒斟望中非遠別眼底乏知音積雨扁舟下烟
波空我心

小亭

小亭初結構踰髮坐高春種竹銷塵氣看山長
道容老藤常倚壁馴鶴不歸松媿是金門吏官
衙盡日封

秋日訪戴錦衣得魚字

花竹映階除官齋秋雨餘家藏大戴禮人在小
山居立馬嘶芳草呼兒烹鯉魚剡溪他日興還
許命中車

伯宗席對月再別吉夫得聲字

幾醉長安月因君萬里行片雲隨袂斷踈影入
簾清小徑花生色微霜鴈有聲他時三五夕一
見一含情

送王僉憲赴江西

地分彭蠡郡人去爽鳩司復此黃花節其如白

露滋長江無轍跡四海是襟期何用青門外停
杯怨別離

送霍明府赴慈谿

代作

別酒泛黃花天風送海槎江城新茂宰館閣舊
通家帆帶雙鳧下山連一鴈斜鯨波深幾許遲
雨淨雲沙

贈溫侍御

昔聞溫御史今見起西臺山立虬髯重霜清
驄馬來家藏金谷酒人是洛陽才簪筆多休暇
新

詩盡日裁

喜舍弟至京

久客遠辭親微官敢厭貧有懷供菽水無恙寄
松筠故國強千里慈闈漸八旬清秋迎養至辛
苦白眉人

同伯宗咏白菊

紅芳搖落盡獨愛一株留嫩蕊含新粉高枝映
素秋花疑青女散人即刻溪遊共醉東籬下無
勞問白頭

初雪別弟南歸

天涯初見雪，匹馬獨歸時。
言念同胞去，彌增老母慈。
敝裘聊解贈，別路正逶迤。
珍重連枝樹，加餐慰我思。

附留別

同芳

停車燕市晚，拂袖朔風寒。
客計憐雙劍，家聲愧二難。
晨昏千里隔，去住各心酸。
醉把連枝樹，雲泥一笑看。

至日簡莊希周寮長

又報青陽至，偏催白髮新。
相看守株者，俱是飲冰人。
館穀勞形役，喧卑老世塵。
難將歲寒意，訴與漢宮春。

馬上咏雪

寒日低黃竹，微風動玉塵。
封條宮柳重，積素野梅勻。
坐失青山色，歸迷白馬津。
半空紛雜沓，疑有散花人。

送劉白川赴順德太守

畿甸新開府，君如關內侯。
嶽雲連趙壁，漳水抱

邢州欲縮銅符去還因王樹留蒲鞞應有待千
騎莫夷猶

首夏諸寮長約遊西郊水寺不赴

四首

聯騎出郊圻南風柳颺絲遠山青不斷芳草碧
如滋入寺孤雲動看花細雨隨社中無酒禁深
負故人期
出郭投蘭若開林引翠微年光花裏遍春色雨
中歸趺坐逢僧話忘機羨鳥飛官閒隨去住莫
令賞心遠

烟霞塵外賞水月鏡中浮問偈來玄度隨緣有
惠休桃花留上騎蓮葉命仙舟忽復雙林杪春
風語栗留

出門無遠近得地即皈依佛日烟光合人天花
雨飛春催黃鳥弄身被白雲圍愧似逃禪客緇
塵滿素衣

大覺菴雙松同謝李二寮長賦

野寺薜蘿深扶踈雙樹林相從大夫後來坐古
松陰高蓋落空翠飛濤入梵音發動問三友珍

重歲寒心

感述

不知老將至結客少年場
驥思仍千里鷓班每
後行官隨心事拙詩與鬢毛蒼
莫歎無知己杯中
有杜康

高比部席賦得蠟炬素屏瓦爵

各一首

書短夜街杯高堂蠟炬來
青煙浮蜃氣明月剖
珠胎光奪三星燦花迎一笑開
相期照肝膽莫使壯心灰

誰裁千嶂雪散入五湖秋
不藉雕蟲技徒令粉黛羞
風簷停絳燭夜榻代青油
徒倚人如玉相看易白頭

爵形存古制瓦注更天然
無謝釭為玉偏宜酒尚玄
足分周鼎重峰起博山
連潦倒風塵裏甄陶憶昔年

和仲中翰喜少岳山人至

二首

越鳥辭南國相啣易水湄
因過仲長宅先報李膺知
醉踏金臺月行吟玉樹枝
平生君莫問山

水是襟期

樵李多才彥夫君念在茲
邇乘婚嫁畢遙赴故人期
名已高玄度詩寧比項斯
神交非一日傾倒莫相疑

寄題洞虛先生水亭 二首

因懷大隱者遙寄小山篇
習靜常依市為農不在田
谷神仙籙載丹藥羽人傳
却笑玄都觀春花空自妍
松篁最深處泉石忽中開
興極魚偏樂機忘鳥

不猜花呈君子色林雜豫章材
時有清風至羲皇白日来

臺榭枕泉流烟霞足勝遊林深疑
伏鳳波靜見潛蚪上客桃花馬
仙人蓮葉舟不能追逸步
夢繞白蘋洲

言念棄榆景寄情山水間
開林引蒼翠留客弄潺湲
魚似杯中泛花從鏡裏攀
池亭秋正好掉月幾人還

同省中諸寮長城商泛舟送陳司業赴留

握手意不盡城南且泛舟欲成湖海別聊為酒
尊留荷芰搖晴日蕪陵送早秋相思何處是溝
水自東流

南州尚炎德不是戒舟時且對前溪渌相看芳
草滋停杯邀去鳥艤棹趁涼颼他日能相憶風
流在水湄

落日下山陂清尊戀故知還從徐孺子留醉習
家池旅鴈秋先報涼蟬晚故悲蘼蕪聊折贈為
感別經時
君有雷陳好予慚李郭舟詎知遊賞地忽動別
離愁把臂留雲住低頭見水流春明門外柳折
處不勝秋

送梅生還永嘉兼吊張有功太僕

鍾期不可作朱絃彈為誰塞鴻辭上國越鳥憶
南枝久客風雲盡高秋草木衰因之寄孤劍遙
挂徐君祠

再東侯大叅

貧家無所有濁酒對黃花落日聞孤鴈秋聲動
萬家談詩待匡鼎問字憶侯芭倘許高軒過柴
門醉月華

九日期黎翰林登高不果

已負登高約難為久客心天涯逢此日誰不憶
山林落日一行鴈秋風萬戶砧何須吹帽落白
雪已盈簷

臨洺驛別聞郎中

共待金門詔平分玉節行關山紆楚國風壤接
齊城駐馬勞相慰飛蓬苦不情郵亭一以別迢
遞暮寒生

雪中簡龔性之

酒出甕頭春雪飛頭上巾宿醒殊未解好景復
相親夜發山陰棹朝尋王翰隣莫辭玉山倒誰
是獨醒人

送呂山人還甬川

客有釣鰲者遨遊齊魯間風雲收翰墨海嶽壯
心顏旅食青山老行吟春草斑甬東川上月夜

夜待君還

伏日百花樓作

我當三伏日來上百花樓委巷牛羊夕平原禾
黍秋清風開戶牖赤日掛簾鈞一枕羲皇夢翩
翩霄漢遊

詠牡丹

四月賞花時春歸花未知色能增國重香不籍
風吹灼爍丹心迥歲豨造化私前溪問桃李早
晚莫相疑

贈鄭虛舟

我愛鄭虛舟翩翩海上鷗文章增趙壁心事問
吳鈎坐惜蘼蕪老行因桂樹畱相逢憐遽別况
是菊花秋

讀宗子相詩有感

一讀一增悲宗生才不羈長風破高浪白日駕
青螭豈獨言銷骨翻令色有絲脩文遇顏子
序定先誰

雪中出郭訪子與

二首

愛爾南州彥同傾北海尊客邊驚歲換雪裏覺
春溫醉弄梅花落行吟松檜存新豐何限酒心
事不禁論

早春寒正急孤客思難裁夾道衝風出巖城踏
雪來君家瓊樹發我醉玉山頽郢曲勞相和青
雲誰愛才

春日同胡比部遊廣慧寺贈上方禪師

佛日臨長陌慈雲抱御堤人天逢大士道岸發
菩提善勝情俱澹心澄路不迷出門堪一咲疑

是虎溪西

題顧舍人雪舫齋得初字

一齋橫素舫四壁草玄書陸海移仙棹恩波滿
直廬夕陽芳草遍春酒落花初予亦浮沉者相
逢解佩魚

送姚長山山人 二首

十年京洛客白首尚緜袍世事看流水交情問
大刀詩將因計拙酒以爲名逃鴻鴈南飛盡真
真一羽毛

九衢春侶海何事復山林莫為屠龍技難酬
踏馬心歌中仍白雪臺下豈黃金去住應回首何
人是賞音

燕臺春草懷子與

燕臺望不極燕草思悠悠末路誰知已親交半
白頭春歸啼鳥盡人去落花愁惟有蘼蕪草青
青滿御溝

答姚秋澗陳橫厓雨中見過留別得同字
踈雨三春暮高軒二妙逢衣沾庭草綠酒泛海

榴紅慷慨歌燕市風流賦漢宮長安行樂地歸
騎莫匆匆

題李鏡川廳下鸚鵡

多言時共忌何用巧如簧且伴金閨彥相憐翠
羽長雕籠栖更穩紅稻啄偏香不學呢喃燕飛
來王謝堂

送陳橫厓赴崇仁文學

憐汝珪璋器而食首着盤橫經三楚秀抱道一
甌寒歲月詞章老乾坤出處難祇應勵晚節計

日薦春官

聞箏得今字

燕市重知音秦箏傳至今
鴈行排短柱鶯語出高林
指下春風細絃端夜色侵
胡姬年十四一曲一關心

送黎鴻臚歸臨江兼訊直溪伯兄

昔拜渝川令相逢伯仲賢
論心在今夕回首憶當年
金鳳洲邊草清波月下船
因君動歸棹飛夢入江天

病中黎秘書見招雅會不赴既以詩示俾
此謝之

騷壇開燕會詞客屬應劉
愧似文園病徒乖清夜遊
幾人翻雪調四座足風流
繪句勞相贈殘年慰獨愁

病起水塘菴 四首

病起不自好行行蕭寺間
平生愛岑寂此地重躋攀
冰結半塘水城飛一片山
寂寂絕人境不省是塵寰

歲暮客情多禪扉此暫過高懷此玄度同病得
維摩坐見青山老愁如白髮何都將去留意皈
命問彌陀

卓錫烟花地開塘水月天入門雙樹老隔坐一
燈懸睥睨留殘照樓臺澹夕烟殘冬冰雪候何
處種青蓮

問偈來精舍焚香淨法筵暫遠金殿直遙借石
牀眠獨坐觀空理忘言識性天紅塵滿京洛誰
解此逃禪

送弟仲連赴趙藩審理

白壁空三獻朱門強一官雖稱賢弟屈能博老
親歡末路丹心怯窮經皓首難昔人托乘地好
去慶彈冠

九日飲仲連對菊

今朝重九日舍弟在長安落日孤雲外空齋一
逕寒况逢新酒熟追賞昔年歡花萼相輝地終
宵如夢看

飲呂公祠賦得秋水蘆花

仙源落人境秋水泛蘆花有客停車騎相將醉
晚霞因風聲浙瀝帶月影交加欲逐吹簫侶飄
飄上漢槎

夜雨感述

春雨夜絲絲遷人獨聽時曉風吹夢遠殘漏出
宮遲嚴譴孤臣罪優容聖主私浮雲如可撥見
日是還期

舟中再贈抑所

離歌苦無調遷客不堪聞魚服終當辨龍媒自
出群停舟坐明月把酒笑浮雲惟有長河水冷
泠可贈君

登天津城樓

去國此登樓天津控上游潮聲撼城郭海氣抱
神州野渡思長楫扁舟畏急流憑軒欲有問飛
鳥不知愁

河上聞鶯

澤國多芳樹流鶯日日新北林啼未歇南陌聽
尤真漢臣方去國楚調益沾巾坐惜

流光轉故園空好春

別吳山人還金陵

北遊不稱意，返棹涉江波。
楚客青楓樹，吳儂白紵歌。
故山歸路永，芳草別時多。
好去滄浪叟，投竿老一蓑。

西莊

何處堪逃暑，西莊負郭田。
柴門填綠樹，苔徑疊青錢。
野色先催黍，秋聲忽到蟬。
何因寄城市，日苦風烟。

薛氏園亭

夙有山林癖，何妨過草亭。
秋來愁作客，花下不宜醒。
對酒同呼白，題詩盡殺青。
醉歌招隱曲，遙寄北山靈。

義門曉行

曙色起林鴉，青天明曉霞。
蕪葭晞白露，墟里帶清沙。
老驥長途怯，新鴻一字斜。
不知時序晚，野菊有黃花。

白龍溝寺

客路不禁秋，蕭蕭雨未休。
潁川城下水，漾出白

龍溝遙望烟中樹來登溝上樓橋危泥正滑端
坐看吳鉤

薛園臘日見梅花

山梅初放萼臘釀復新筍况此歲寒日兼之地
主留門停塞翁馬官比醉鄉侯若問升沉事知
心有酒甌

少年行

金貂換美酒白日登毬場醉控紫駟馬調笑青
樓倡腰下庶盧劔手中明月璫歲徒樾李月春

風羅綺香

薛樓春望

新年饒客思南陌臨高臺弱柳烟初結寒梅雪
並裁鈎簾放春入揮手撥天開坐見蒼茫裏孤
雲帶鴈來

署蒙城作

行縣苦不樂膏騰醉復醒不知春幾許郊外柳
條青官舍隨梁燕羈心嘆水萍會當投劾去濮
上卧烟汀

夜泊五河

踈雨蕭蕭暮泊舟
臨五河斷崖束板壁
小艇掛漁簑
春色催楊柳
鄉心悵薜蘿
急流翻一笑
何事涉風波

登浮山寺

長淮浮斷石
古寺度鳴鍾
水泐仙人洞
崖懸羅漢松
河流思禹鑿
湯沐見堯封
獨立丹霄上
題詩寄宦蹤

和常建舟泊盱眙

南岸盱眙縣
高臨泗水清
斷崖躡古廟
深樹掩孤城
二月扁舟下
春山候鳥鳴
羈心誰不似
淒切古今情

過清河憶舊尹石才卿

骯髒悲吾友
鳴琴水一方
土風多意藎
城市半豺狼
身化淮南橘
人歌召伯棠
經過問舟子
指點說桐鄉

白馬湖

淮海下維揚
湖波一鏡長
天風來八面
春色澹

孤光高鳥駛於箭洪濤沸若湯蕭蕭沙岸柳偃
蹇不成行

高郵

澤國倚蒹葭春波冷萬家漁人喧浦淑估客醉
烟花海氣晴吞雨湖光曉盪霞開篷一以望草
色遍天涯

抵維揚簡同謫丘水部露澤

維揚二月春花裏度迷津言附登龍選遙尋跨
鶴人感茲同落魄念爾益傷神若問西來意孤

懷難具陳

贈吳萬山射陽二子

海內論才子淮南有二吳山中攀桂樹花下著
潛夫老鶴秋搏露神龍夜抱珠何時隨杖屨五
岳覽真圖

迷城寺

反旆赴中京官家有刻程所希逢覺路復此入
迷城宮蹟山花笑禪房春草迎何須頻問偈法
鏡掌中明

何明府邀宴荆山

名山堪載酒驛使暫停車斜日長淮水春風一
縣花平崖喧立馬深樹點歸鴉更坐莓苔上殘
尊照落霞

首夏送舍弟仲連還故園

垂柳碧如絲王孫別在茲不堪分手地正值賞
花時晚節青松見春音黃鳥知關河如見憶好
寄鵲鷓詩

金門曾把袂玉樹贈連枝豈憶過逢地南州佐

郡時去留人異雁悲喜髮成絲何處無春草隨
風入夢思

雒河寄王鳳村少府

言赴漆園吏時當楊柳春簡書何太迫花事苦
相親夜醉林中酒朝隨陌上塵殷勤謝黃綺應
笑薄遊人

王鳳翁南庄談道

白首未聞道青陽忽以歸偶來穆下坐悟我寰
中機夏草歇芳徑晴雲淡落暉高臺時散步道

遙見鶴飛

范羅鋪小樓即事

吞聲復何恨兀坐不能禁豈為逢迎出因之一
散心竹窓風細細草閣晝陰陰莫究浮生事垂
堂有萬金

雙澗

水村昨夜雨雙澗亂鳴蛙野樹團新綠山風掃
落霞桑麻紆小徑鷄犬問誰家忽轉前溪路依
依見藕花

渡淮

長淮浩不極塗山烟霧深偶隨流水意忽動榜
舟心未了官家事徒令年鬢侵滄浪無釣叟誰
與話同襟

居易亭偶作

迎養家非遠爲州官不卑况茲佳麗郡復此艷
陽時花氣薰蘭酌歌聲泛竹枝更尋清絕地泉
上賦新詩

中都同孫傅二使君登萊一山因贈曉堂

禪師十首

先皇皇覺寺乃在萬松間我携二千石來登第
一山風林蟬迤響雲際鳥飛還不飲盈觴酒巖
花空自斑

禪關閒常掩祗樹澹生花劫火何年滅仙源一
逕斜影堂函舍利僧飯出胡麻開士勞相問青
蓮是故家

地臨湯沐郡亭起翠微峰密樹藏山日回風落
午鐘洞門蒼靄合 御篆紫苔封却望橋陵道

雲成五色龍

遠公不禁酒此地許處禪羅磴攀雲上松陰抱
石眠神龍喜深蟄高鳥避驚絃且對林中梵飯
依靜者緣

因過清賞地不分老僧閒醉倚菩提樹心灰夢
覺關微雲斜度嶺落日倒銜山擾擾紅塵裏逢
君祗厚顏

日落千岩紫天垂四壁青坐驚山鬼嘯醉伴野
狐聽細雨當軒入南風吹酒醒不知身是佛夢

注法華經

萬事膏騰過吾生未有涯
久知身是幻合以醉
爲家夜吸長淮水朝食小洞霞
山僧無酒供隨意典袈裟

往事已陳跡浮生隨所遭
且沽千日酒留醉五陵
豪花雨飄香閣松風捲翠濤
平生君莫問天地一鴻毛

官如醉司馬身是病維摩
拄笏山無恙彈冠髮已皤
未除煩惱障其柰簿書何
何處堪招隱淮

南桂樹多

偶爾耽幽寂因之忘去留
狂來生故態象外愜清遊
面目本如此身心何所求
欲歸歸便得猿鶴莫深愁

得高伯宗書

楚天不可極思爾日悠哉
忽枉雲中字翻疑夢裏開
賈生元不偶高適自多才
海內交遊盡青山歸去來

懷孫京兆

握手金門步論心青瑣闈天風一以振落羽各
分飛遷客投湘賦高人息漢機浮沉何足道所
惜寸心違

荆山道中

自落風塵裏荆山幾度過九岡十八漥來往似
平坡暑氣含朝雨淮流漾夕波孤舟橫野渡延
佇意如何

送薛道行赴試留都

神龍起深壑風雨下崑崙秋色開吳苑雷聲過

海門邾林攀桂樹江草憶王孫爾踏青雲去幽
懷誰與論

感述

改服辭京邑甘心赴謫居漆園堪種樹濠上好
觀魚招客淮王館陶情老氏書此鄉堪吏隱何
異在山廬

薛園飲呂汪吳三山人

吏事何其迫秋風稍可人城南一散睇花下幾
閒身客帶烟霞色尊開麴米春相看黃髮暮留

醉白綸巾

秋日飲朱叅戎近泉山亭次韻

臺敞秋偏入亭孤景易斜
小山逢桂樹白日蔽
丹霞坐引濠梁客行吟杜曲花去留本無住歸
路莫言賒

